

Artista Cado De Lannoy capturando nos herencia den diferente perspectiva

ORANJESTAD - Cado De Lannoy ta un artista dedica na haci arte/fotografia di herencia Arubiano cual e ta presenta den diferente perspectiva. "Aruba ta conoci pa su playanan, palma entre otro pero ami ta muestra cu nos tin mas historia haciendo uzo di colornan, monumetonan, edificionan entre otro."

Number

E number artistico di Cado su carera di arte/fotografia ta Cadosbla cu e ta bisa ta un number hopi 'random' cual e ta haya hopi pregunta di su nificacion. "Tabatin un periodo cu mi tabata traha algun T-Shirt cu fotografia blanco cu preto, pues e tabata Cado's Black & White T-shirt edition y mi a muestra mi amigo e tag y el a lesa e prome frase solamente, y a puntra mi kico ta Cados bla? Mi a bis'e djis sigui lesa (pasobra e resto tabata core den un otro frase). Y desde e dia ey el a bira algo pret y el a djis pega.

Cado ta haya su material, of locual cu e kier presenta na tur sitio rond di Aruba. E ta splica cu e ta un persona hopi pafo e ta surf y cada cos cu e haci e ta mira como un oportunidad pa encontra algo interesante. "Rond di Aruba tin e casnan tipico bieu por ehempel, algun di nan bandona y otronan cu hende ainda ta biba aden pues tin un storia cu cada un dia nan." El a sigui bisa cu recientemente e tabata na New York unda cu el a tuma un curso di fotografia como cu e kier bira miho den locual cu e ta haci. Semper el a siña su mes locual cu e sa, pues el a dicidi di tum'e mas serio pa profesionalisa den fotografia digital, cual e ta haya un paso importante den e aspecto di negoshi y como artista. El a expone locual cu e tin te cu awo di Aruba tambe na New Jersey, unda cu el a haya bon reaccion pa su exhibicion. Na Aruba e sosten



ta grandi como cu tur hende conoce tur hende mas o menos. P'esey e kier a expone su arte den exterior a mira con otro hende ta reaccion riba esakinan. "Nan tabata hopi interesa y nan ta haya mi estilo hopi unico. Tin algun potret cu ta muestra manera un pintura y nan ta gusta e concepto."

Obtenibel

Algo hopi interesante cu por haya den e coleccion di arte di Cado ta su coleccion di mosaico antique di Aruba cual e ta saca potret di dje y e ta a imprimi riba articulonnan cu ta wordo uza diariamente manera "coasters". Esakinan ta wordo poni na benta na Korteweg, Cosecha, net patras di parlamento, mientras cu e ta kedando cla un luga na hotel y uno na San Nicolas unda cu un gallery/store a habri. Nan a acerca Cado como cu e luga kier expone y bende arte local y internacional, pues e ta bay tira un bista den esaki. Internacionalmente e tin su artenan disponibel na New Jersey.

"Aworaki mi ta experimentando e diferente posibilidad nan pa print y presenta mi fotografia na un manera diferente pasobra fotografia ta obtenibel den maneranan hopi basico. Aworaki mi ta print riba palo y mi ta hayando hopi bon reaccion y ta diferente."

Den pasado Cado tabata forma parti di un team cu ta diseña un marca di paña Duck&Robots cu hopi conoce aki na Aruba. Pues a puntr'e kico a inspir'e pa bay e rumbo di arte cu aki. El a splica cu berdad ora e tabata traha cu Duck&Robots e tabata saca potret y semper tabata busca edificionan bandona pa e photoshootnan. Pues semper e inspiracion tabata bin di esaki. "Tur hende semper a bisa mi cu mi mester haci locual cu mi ta gusta, sinembargo nunca mi tabata sigur den dje y a hacie manera un hobby. Tè cu pa algun aña awo cu mi ta sacando mas potret mi por bisa cu mi a bay full den dje. Despues di mi carera di Beach Tennis aki,

mi a dicidi di djis sigui e rumbo di fotografia aki." Un reto segun Cado ta cu su carera no ta algo sigur ainda, esey ta un aspecto poco espantoso. Pero e ta kere den haci locual cu bo ta gusta tur dia y ta hopi motiva den haci esaki.

Aruba definitivamente ta habriendo mas pa loka ta Artistanan y arte Arubiano, specialmente sitionan manera Korteweg cu ta pushando esaki hopi y awo tin Cosecha tambe. "Tin artistanan cu definitivamente ta biba di nan arte. "Ami kier inspira entrepreneurship, bo por biba manera un artista pero bo por uza bo arte tambe pa traha articulonnan y bende esakinan."

Korteweg

"Mas o menos dos luna pasa mi a wordo nomina pa Hoben y Talentoso 2015 den e categoria di 'Entrepreneurship & Culture' cual ta hopi great. Tambe Korteweg cual Cado a funda ta hayando un 'prestige award'. Korteweg ta existi desde mei/juni y ta forma pa Cado, Ashlin, Frankie

y Mario, Cado a splica."

"Ash tin su marca di tas Tangerine, Frankie ta traha e bebidanan natural Taki Aruba y Mario ta un 'All around handy man' e por traha tur cos." E grupo a inicia esaki como cu tabatin fiesta den caya y tabata papiando cu e minister di cultura riba con por pone algun arte y creacion den caya grandi pa atrae hende. "Mi a puntra e minister pa duna mi un oportunidad pa presenta e idea aki y wak con e ta bay. El a bisa mi dal bay djis scoge un sitio, pues mi a scoge Korteweg. Na e sitio mi a yega cu palte, mi a acerca algun artista pa uni y wak con hunto por bende algun cos, y el a resulta positivo. Esey ta ora cu mi a bisa mi amigo nan pa nos haci esaki hunto pero na un escala mas grandi. Nos a haya ayudo di Unoca y nan a yuda hopi bon den cada evento cultural cu nos a organisa. Nos ta kere den presenta arte cu un bon ambiente, no djis pone algun articulo riba mesa, sino ful un experiencia pa local y turista."

A puntra Cado si e tin mas proyecto na caminda y kico por spera di dje. Hariendo el a bisa: "Mi tin mucho cos andando, mi a cuminsa laga algun cay afo. Hopi hende ta acerca mi y puntra si mi kier forma parti di algo. Aworaki mi ta purba di wak kico ta miho pa mi mes tambe en bes di ta tur caminda." Cado actualmente ta traha Part-Time na Cosecha yudando cu medio social y mehorando nan promocion di arte. Concluyendo el a bisa: "Na e momentonan aki e miho parti di mi trabou ta cu mi por haci locual cu mi kier. Mi ta traha cu tur circulo di hende, basicamente unda cu mester ayudo cu creatividad y si mi wordo yama, mi t'ey. Mi trabou ta hopi varia, mi por haci uzo di mi banda artistico door di traha articulonnan cu palette por ehempel, diseña interior, fotografia y mas. □